

Oleh Suliati Asri
suliati@hmetro.com.my

KEUNIKAN NEGERI SEMBILAN

'Sembilan Identiti' negeri beradati

Umum mengetahui, keunikan Negeri Sembilan terletak pada Adat Perpatih yang diamalkan sejak dahulu lagi.

Bukan itu saja, keunikan makanannya terutama Gulai kuning juga antara yang sentiasa dikaitkan dengan negeri itu.

Namun, ramai yang tidak tahu pelbagai lagi keunikan dan pengenalan yang dimiliki negeri beradati ini.

Justeru, bagi memastikan negeri ini mempunyai identiti khas sekali gus mengangkat Negeri Sembilan yang kaya dengan budaya tersendiri ini, ia diterjemah menerusi 'Sembilan Identiti'.

Dilancarkan pada 9 Jun lalu oleh Menteri Besar Negeri Sembilan, Datuk Seri Aminuddin Harun, sembilan identiti Negeri Sembilan secara rasminya menjadi pengenalan kepada negeri ini.

Ia merangkumi Adat Perpatih, seni bina iaitu rumah tradisional bumbung panjang, makanan tradisional iaitu gulai kuning, busana Negeri Sembilan, bunga lada, permainan tradisional iaitu dam harimau dan gasing Negeri Sembilan, muzik iaitu Cak Lempong, tarian piring lambung dan enam buah lagu iaitu Lambaian Negeri, Orang Kito, Pepatah Petitih, Dirgahayu Yang di-Pertuan Besar, Nogori dan Moh Dogheh.

Aminuddin berkata menerusi perasmian sembilan identiti itu, ia dapat memamerkan keunikan adat dan budaya yang dimiliki masyarakat Negeri Sembilan terutama kepada masyarakat luar.

"Jadi, menerusi identiti khas ini, masyarakat boleh mengetahui dengan lebih mendalam apakah ciri, muzik dan pakaiannya Negeri Sembilan," katanya.

Bukan itu saja, sembilan identiti ini juga memberi impak positif kepada sektor ekonomi dalam negeri menerusi pelaksanaan aktiviti sosial seperti pengamalan dan pengkajian adat perpatih.

Ia juga memberi peluang kepada pengusaha industri kecil dan sederhana untuk memasarkan produk berkaitan dengan ciri-ciri sembilan identiti itu.

Dengan itu semua produk yang berkaitan secara terus, masyarakat akan mengetahuinya sebagai satu produk yang berasal dari Negeri Sembilan kerana ia diletakkan sebagai identiti Negeri Sembilan.



RUMAH tradisional bumbung panjang. - Gambar ihsan Lembaga Pelancongan Negeri Sembilan



CAKLEMPONG



GASING Negeri Sembilan

Dari segi pelancongan pula, Sembilan identiti ini membolehkan masyarakat ini dan juga seluruh negara boleh mengenali Negeri Sembilan dengan lebih dekat.

Justeru, Lembaga Muzium Negeri Sembilan secara proaktif berperanan dalam mempromosi sembilan identiti. Ia dikembangkan melalui pameran statik, aktiviti di peringkat negeri, pengembangan seminar, kolokium.

SEMILAN IDENTITI NEGERI SEMBILAN

1. Adat Perpatih

Ciri-ciri Adat Perpatih ini adalah Islam, menggunakan sistem kepimpinan berasaskan sistem demokrasi, salasilah keturunan sesebuah keluarga dan

suku berdasarkan keturunan ibu; Seni dan Budaya pula merujuk kepada seni bina, makanan, muzik dan lagu, pakaian, adat dan istiadat, cerita rakyat, pantang larang dan lain-lain.

2. Seni Bina

Rumah tradisional bumbung panjang sekali gus melambangkan pengamalan budaya Adat Perpatih oleh masyarakatnya.

Setiap luak ada perbezaan daripada segi reka bentuk asas dan berbeza dengan seni bina rumah gadang. Ia juga menggabungkan ciri-ciri alam bina dari Minangkabau, Melayu Riau khususnya Bangkahulu dengan masyarakat tempatan (Orang Asli).

3. Gulai Kuning untuk makanan tradisional

Pada November 1977, Majlis Mesyuarat Kerajaan Negeri Sembilan memuatkan Masak Lomak Lado Api menjadi identiti Negeri Sembilan dan kini diangkat semula sebagai Gulai Kuning.

Bahan-bahan utama dalam masakan ini adalah simbolik bagi menyediakan Gulai Kuning iaitu santan, cili padi kampung (*capsicum frutescens*) serta kunyit hidup yang menjadikan masakan berwarna kuning sekali gus menjadikan Gulai Kuning berbeza dengan masakan negeri lain.

4. Bunga Lada

Bunga Lada atau Lado di dalam sebutan masyarakat Negeri Sembilan adalah bunga yang boleh melambangkan keunikan yang terdapat di Negeri Sembilan.

Bunga ini juga membawa maksud dan lambang tersendiri iaitu Daun melambangkan rakyat Negeri Sembilan, lima kelopak bunga melambangkan lima Rukun Islam dan Rukun Negara, Stamen (Benang Sari) Undang Yang Empat (Undang Sungai Ujong, Undang Jelebu, Undang Johol, Undang Rembau) dan Tuanku Besar Tampin dan Stigma melambangkan Yang di-Pertuan Besar.

5. Gasing Negeri Sembilan & Dam Harimau

Untuk permainan tradisional, Negeri Sembilan memperkenalkan dua identiti iaitu Gasing Negeri Sembilan (outdoor) dan Dam Harimau (indoor).

Permainan gasing dipercayai sudah dimainkan oleh masyarakat Negeri

Sembilan sebelum merdeka lagi untuk melahirkan semangat silaturahmi masyarakat.

Dam Harimau pula adalah permainan popular kanak-kanak dan dewasa satu ketika dahulu. Permainan ini mudah dimainkan dengan penyediaan papan dam yang boleh dilukis sendiri serta buah dam/tir adalah daripada kayu atau tudung botol diwarnakan dalam dua warna untuk membezakan pemain.

6. Caklempong

Bagi kategori muzik Caklempong dikenali juga sebagai telempong oleh orang Minangkabau tergolong dalam kumpulan Idiofon iaitu kategori alat muzik yang dibuat daripada bahan kayu, buluh dan tempurung.

Caklempong boleh dimainkan secara berdiri dan duduk Caklempong pacik digunakan untuk mengiringi perarakan tetamu dimainkan sambil berjalan.

7. Tarian Piring Lambung

Tarian Piring Lambung menjadi identiti tarian masyarakat Negeri Sembilan.

Setiap setiap gerak tari tarian piring lambung ini melambangkan kehidupan masyarakat Negeri Sembilan.

8. Enam lagu terbitan Lembaga Pelancongan

Negeri Sembilan (LPNS).

Berlatar belakangkan Negeri Sembilan, lagu Moh Dogheh (Aishah), Orang Kito (Ito), Lambaian Negeri (Aishah), Pepatah Petitih (Ewal), Nogori (Waghah) dan Dirgahayu Yang di-Pertuan Besar (Fitri) diangkat sebagai lagu identiti untuk Negeri Sembilan.

Enam lagu yang beridentiti Negeri Sembilan dan menggunakan loghat Negeri Sembilan digubah dibawah projek yang diterajui oleh Jabatan Kebudayaan dan Kesenian Negara (JKKN) Negeri Sembilan dan diterbitkan LPNS.

9. Busana tradisional

Untuk kategori busana tradisional, ia terbahagi kepada dua iaitu busana tradisional lelaki dan Wanita.

Untuk busana tradisional lelaki, identiti bajunya adalah Baju Melayu Cekak Musang iaitu pakaian yang mempunyai kolar baju bercek tinggi berdiri iaitu setinggi 2.5 sentimeter (cm) yang melingkari leher.

Pakaian ini juga mempunyai pesak, berkekek dan berpoket tiga serta terdapat lima buah kancing di leher yang melambangkan Rukun Islam.

Manakala untuk busana tradisional Wanita pula ialah Baju Kurung Ibu Soko, baju Kebaya Setengah Tiang dan baju kurung Pengantin Negeri Sembilan.

Menariknya, ketiga-tiga busana ini mempunyai ciri-ciri yang unik. Baju kurung Ibu Soko ia mempunyai leher Telok Belanga Jahiran Tulang Behut dan mempunyai ikatan tindih kasih serta potongannya berbentuk kembang payung, berpesak dan berkekek.

#NegeriSembilan
MELAYU
MADANI

SELAMAT MENYAMBUH HARI KEBANGSAAN

YAB Datuk Seri Majlis Aminuddin Harun
Menteri Besar Negeri Sembilan
Kerajaan Negeri dan Jawatan Rangkap
Negeri Sembilan Darul Iktisam